

sehingga manusia pandai hidup secara bersuku bangsa dengan menegakkan suatu masyarakat yang lebih luas yang dinamakan kerajaan, sama ada kerajaan itu berdasarkan pemerintahan beraja ataupun secara republikan dengan mengikuti pertunjukan-pertunjukan yang berdasarkan pemikiran falsafah dan kemasyarakatan. Dari sejak manusia mulai kenal kepada ilmu falsafah dan kemasyarakatan, maka dari sejak itulah undang-undang negara ciptaan manusia kian lama kian berkembang dengan pesatnya menuju ke arah kesempurnaan dan kelengkapan itu tidak dapat menandingi kesempurnaan dan kelengkapan yang didapatkan di dalam undang-undang *sharī‘ah Islāmiyyah* ciptaan Tuhan *al-‘Aliyyu al-Qadīr. ‘Alā kulli hāl* meskipun demikian dia sudah ada mempunyai teori dan perinsip yang lebih teratur yang belum pernah didapatkan pada zaman-zaman yang lalu

#### **Tabiat Sharī‘ah Tidak Sama**

##### **Dengan Tabiat Undang-undang Negara:**

Setelah kita bandingkan kemunculan di antara *sharī‘ah Islāmiyyah* ciptaan Tuhan dengan kemunculan undang-undang negara ciptaan manusia, maka di sini bolehlah kita memberi kesimpulan dengan mengatakan: “Sesungguhnya *sharī‘ah Islāmiyyah* itu tidak sama keadaannya dengan undang-undang negara, tabiat *sharī‘ah Islāmiyyah* itu tidak sama dengan tabiat undang-undang negara, meskipun kedua-duanya merupakan suatu peraturan untuk dijadikan panduan oleh manusia yang hidup bermasyarakat. Tetapi *sharī‘ah Islāmiyyah* adalah merupakan suatu peraturan yang cukup sempurna untuk dijadikan panduan hidup oleh golongan Banī

Adam yang datang dan pergi silih berganti dari suatu di zaman ke suatu zaman. *Sharī‘ah Islāmiyyah* adalah suatu undang-undang ciptaan Tuhan yang memang sudah sempurna dan lengkap dari sejak ia diturunkan. Ia tidak berhajat kepada sebarang perubahan dan pindaan. Bersalah dengan keadaan undang-undang negara ciptaan manusia, ia selamanya tak boleh lengkap dan sempurna selagi perkembangan masyarakat hidup manusia menerima perubahan, ia sentiasa mengikuti perubahan-perubahan yang berlaku di dalam masyarakat hidup manusia dari suatu zaman ke suatu zaman. Ia tidak sesuai digunakan di dalam semua zaman yang datang dan pergi.

Oleh itu tidak hairan kalau kita dapati meskipun undang-undang negara itu telah melalui zaman yang beribu-ribu tahun lamanya namun begitu ia masih juga lagi kurang, masih belum lengkap sempurna dan masih berhajat kepada beberapa pindaan dan perubahan.

(bersambung)

---

#### **Kata-kata Hikmah**

Tidak pernah papa orang yang cermat, dan tidak pernah binasa orang yang pemurah.

\* \* \*

Kalau engkau tetap dalam kemunduran, dan maut itu tetap dalam kemajuan, alangkah lekasnya keduanya bertemu!

\* \* \*

Sebesar-besarnya kekayaan itu, ialah meninggalkan angan-angan.

#### **Berita-berita Ringkas dari Alam Islami**

Berita dari Kaherah menyatakan bahawa pemerintah Republik Arab Bersatu telah meminta supaya tentera-tentera Bangsa-bangsa Bersatu menarik diri dengan seberapa segera dari sempadan di antara Republik Arab Bersatu dengan Israel di kawasan Gaza, demi untuk menjaga keselamatan diri mereka sendiri. Republik Arab Bersatu dalam masa beberapa hari yang lalu telah menyuarakan ancaman-ancaman hendak menyerang Israel jika berlaku pertempuran baru di sempadan Israel – Syria.

Pasukan tentera Bangsa-bangsa Bersatu yang berada di sempadan Israel Gaza itu berjumlah 4,000 orang terdiri dari tentera-tentera India, Kanada, Denmark, Norway, Sweden dan Yugoslavia.

\* \* \*

**Berita dari Baghdad** menyatakan dari bulan Mei yang lalu Kementerian Kesihatan Iraq telah mengadakan kempen secara besar-besaran, melawan wabak *Cholera* di seluruh negara. Lebih daripada 150 buah pusat-pusat penyuntikan telah dibina di seluruh kota Baghdad dengan mengadakan 50 rombongan anggota penyuntikan yang akan menjalankan tugas menyuntik rakyat seluruh negara.

Doktor Abdullah al-Khaḍīr Pengurus Perkhidmatan Perubatan Iraq telah berangkat ke Kuwait untuk mengadakan perhubungan secara kerjasama dengan kerajaan Kuwait bagi menentang merebaknya wabak *Cholera* di kedua negeri yang berjiran itu.